



Sesida dals

Communitgà ils

Protocol nr.

24 d'avrigl 2018

26 d'avrigl 2018

328

Incumbensa Caduff

concernent il program d'incubatur per il Grischun

Resposta da la regenza

Er la regenza è da l'avis ch'interpresas giuvnas sajan da gronda impurtanza per la creschientscha d'ina economia publica. Ils ultims decennis è resultada ina purschida d'iniziativas per promover interpresas giuvnas quasi en l'entira Svizra. Ils incubatur èn in element da questa promoziun. En tut la Svizra existan oz passa 70 incubatur. Il dumber dals incubatur en Svizra s'augmenta vinavant. Incubatur porschan differents programs, q.v.d. ina differenta maschaida da prestaziun en ils secturs da l'infrastructura d'interpresas (p.ex. locals da biro, laboratoris, lavuratoris), da la cussegliaziun per concepir ina interpresa, dal coaching dals imprendidurs giuvens sco er da la colliaziun en ina rait cun l'industria, cun la scienza, cun la perscrutaziun e cun partenaris da finanziaziun. Ils differents concepts sa cloman centers da fundaziun, tecnoparcs, centers d'innovaziun, centers da tecnologia, acceleratur, impact hubs e.u.v. Intgins stattan a disposiziun a tut ils genres d'interpresas giuvnas, auters èn focussads sin tschertas tematicas. Ils tecnoparcs èn orientads fermamain a las interpresas giuvnas da tecnologia. Ils set tecnoparcs da la Svizra – trais da quels en il chantun Turgovia – èn colliads en l'uniun Alleanza da tecnoparcs e porschan als commembers in access facilità a lur rait en la scienza, en la perscrutaziun ed en l'industria.

En il Grischun exista dapi l'onn 1999 in incubatur privat a Grösch, che vegn manà da la "Fundaziun grischuna INNOZET". L'INNOZET ha domicilià cun success interpresas giuvnas che derivan dals conturns da la Firma TRUMPF Svizra SA (Trumpf). Perquai che la firma Trumpf dovra sezza las localitads, sto INNOZET tschertgar a media vista in nov lieu da staziunament. En collavuraziun cun INNOZET ha il chantun elavurà in concept general per in tecnoparc Grischun, in incubatur orientà a la tecnologia. Il concept tecnoparc ha l'intenziun da vegnir integrà en l'Alleanza dals tecnoparcs. Sin basa dal concept general ha la regenza decidì ils 14 da november

2017 da princip da realisar il tecnoparc Grischun. L'uffizi per economia e turissem è vegnì incumbensà d'elavurar – en collavuraziun cun ina terza part adattada – in concept detaglià per realisar il project tecnoparc Grischun e da suttametter quel a la regenza.

Cun la nova lescha per promover il svilup economic en il chantun Grischun (LSE, DG 932.100) posseda il chantun Grischun la basa legala per sustegnair cun em-prests u cun contribuziuns in incubatur tant sco agen project sco er sco project qualifitgà d'ina terza part. Cun la LSE è er vegnida stgaffida la pussaivladad per promover particularmain projects innovativs cunzunt er da start-ups. La promoziun dal chantun sa basa tranter auter sin il princip da la teoria da la basa d'export.

Il schaner 2018 è vegnì preschentà a la publicitad il center d'innovaziun InnoQube ch'è previs a Cuira. Quest center planisescha er in program d'incubatur per interpresas giuvnas. Questa iniziativa privata da la InnoQube Swiss SA sco er ulteriurs projects che prevesan autras furmas per sustegnair interpresas giuvnas, sco p.ex. il InnHub a la Punt ch'è actualmain en la fasa da concepziun, vegnan beneventads zunt fitg dal chantun. Per savair, sche singuls programs d'incubatur ch'èn vegnids iniziads sin basa privata, sa laschan cumbinar cun il project da tecnoparc previs da la regenza, dovri anc ulteriurs scleriments.

Grazia a la promoziun d'interpresas giuvnas tras incubatur en il chantun Grischun vegni spetgà che la scena da start-ups survegnia dinamica tras ideas innovativas che vegnan sviluppadas vinavant en il Grischun e che vegnan lantschadas sin il martgà. Quai rinforza tant il Grischun sco lieu d'innovaziuns sco er l'economia grischuna en sia totalitad.

Sa basond sin questas consideraziuns propona la regenza al cussegl grond d'acceptar questa incumbensa.



En num da la regenza

Il president:

Il chancelier:

Dr. Mario Cavigelli

Daniel Spadin